



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ**

ք. Երևան

11.09.2020թ.

Ո Ր Ո Շ ՈՒ Մ

**ՀՀ գնումների հետ կապված բողոքներ քննող անձի
թիվ ԱՑ-ՆԳ-2020/213**

Հայաստանի Հանրապետության գնումների հետ կապված բողոքներ քննող անձը՝ ի դեմս Գրիգոր Ներսիսյանի, ուսումնասիրելով Հայաստանի Հանրապետության ֆինանսների նախարարության՝ 27.08.2020թ. թիվ 26/26-1/12916-2020 գրությամբ «Գրաֆենշին» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ Լոռու մարզի Վանաձորի համայնքապետարանի (հետայսու նաև՝ Պատվիրատու) 27.08.2020թ. թիվ 061/9860 գրության հիման վրա, 27.08.2020թ. թիվ 26/26-1/12916-2020 գրությամբ նախաձեռնել է «Գրաֆենշին» ՍՊԸ-ին (հետայսու նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «Գրաֆենշին» ՍՊԸ-ի ներկայացրած փաստարկները և դիրքորոշումը.

«Գրաֆենշին» ՍՊԸ-ի կողմից, ՀՀ գնումների հետ կապված բողոքներ քննող անձի սույն որոշումը կայացնելու օրվա դրությամբ, գրավոր դիրքորոշում չի ներկայացվել:

Ընկերությունը, պատշաճ ծանուցված լինելով ՍՑ-ՆԳ-2020/213 ընթացակարգի շրջանակներում 11.09.2020թ. ժամը 11:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը նիստին:

3. Վանաձորի համայնքապետարանի կողմից ներկայացված փաստարկները և դիրքորոշումը.

ՀՀ Լոռու մարզի Վանաձորի համայնքապետարանը ՀՀ ֆինանսների նախարարությանն ուղղված 27.08.2020թ. թիվ 061/9860 գրությամբ հայտնել է, որ Վանաձորի համայնքապետարանի կողմից 13.08.2020թ. հայտարարված «ՀՀ ԼՄՎՔ ԳՀԱՇՁԲ-20/92» ծածկագրով մրցույթի մասնակից՝ «Գրաֆենշին» ՍՊԸ-ի /ՀՎՀՀ 00126761/ կողմից ներկայացված հայտում արձանագրվել են հրավերի պահանջների նկատմամբ անհամապատասխանություններ:

«ՀՀ ԼՄՎՔ ԳՀԱՇՁԲ-20/92» ծածկագրով ընթացակարգի գնահատող հանձնաժողովը որոշել է հրավերի 1-ին մասի 8.9 կետի համաձայն մեկ աշխատանքային օրով կասեցնել նիստը՝ մասնակցին առաջարկելով մինչև կասեցման ժամկետի ավարտը՝ «24» «օգոստոսի» 2020թ. ժամը 10:00-ն, շտկել անհամապատասխանությունները: «Գրաֆենշին» ՍՊԸ-ի կողմից արձանագրված անհամապատասխանությունները չեն շտկվել, ուստի ներկայացված հայտը մերժվել է հրավերի պահանջներին չհամապատասխանելու հիմքով:

Պատվիրատուն, պատշաճ ծանուցված լինելով ՍՑ-ՆԳ-2020/213 ընթացակարգի շրջանակներում 11.09.2020թ. ժամը 11:00-ին հրավիրված նիստի վերաբերյալ, չի ապահովել իր ներկայացուցչի մասնակցությունը նիստին:

4. ՍՑ-ՆԳ-2020/213 ընթացակարգի քննության համար էական նշանակություն ունեցող փաստերը.

ՍՅ-ՆԳ-2020/213 ընթացակարգի քննության համար էական նշանակություն ունեն հետևյալ փաստերը.

1. Վանաձորի համայնքապետարանի կողմից իր կարիքների համար Վանաձորի աթլետիկայի ՕՀՄՄ ՀՈԱԿ-ի ներքին վազքուղու կառուցման աշխատանքների ձեռքբերման նպատակով հայտարարվել է «ՀՀ ԼՄՎՔ ԳՀԱՇՁԲ-20/92» ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով հայտ է ներկայացրել «Գրաֆենշին» ՍՊԸ-ն:

2. Ընկերության կողմից Ընթացակարգին ներկայացված հայտում ներառված Հավելված 2-ը՝ գնային առաջարկը, հաստատված չի էլեկտրոնային թվային ստորագրությամբ:

3. Ընթացակարգի գնահատող հանձնաժողովի 20.08.2020թ. նիստի թիվ 2 արձանագրության համաձայն՝ «Գրաֆենշին» ՍՊԸ-ի կողմից ներկայացված հայտում կցված հայտի ապահովումը սխալ է, թերի է լրացված հավելված 1.1-ը, բացակայում է մասնակցի կողմից լրացված և հաստատված ծավալաթերթը:

4. Ընթացակարգի գնահատող հանձնաժողովի նույն արձանագրության համաձայն՝ որոշում է կայացվել նիստը մեկ աշխատանքային օրով կասեցնելու վերաբերյալ՝ մասնակցին առաջարկելով մինչև կասեցման ժամկետի ավարտը՝ 24.08.2020թ. ժամը 10:00-ն, շտկել անհամապատասխանությունները:

5. Ընթացակարգի գնահատող հանձնաժողովի քարտուղարի կողմից 20.08.2020թ. armeps.am էլեկտրոնային համակարգի միջոցով ուղարկվել է ծանուցում արձանագրված անհամապատասխանությունները շտկելու վերաբերյալ:

6. Ընթացակարգի գնահատող հանձնաժողովի նույն արձանագրության համաձայն՝ արձանագրված անհամապատասխանությունները «Գրաֆենշին» ՍՊԸ-ի կողմից սահմանված ժամկետում չեն շտկվել և 24.08.2020թ. որոշում է կայացվել վերջինիս հայտը մերժելու վերաբերյալ:

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ Գրիգոր Ներսիսյանս, ուսումնասիրելով ՀՀ ֆինանսների նախարարության 27.08.2020թ. թիվ 26/26-1/12916-2020

գրությունը, Վանաձորի համայնքապետարանի 27.08.2020թ. թիվ 061/9860 գրությունը՝ կից փաստաթղթերով, հայտնում են հետևյալը.

«Գնումների մասին» ՀՀ օրենքի (հետայսու նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 34-րդ հոդվածի 1-ին մասի համաձայն՝ **հայտերը գնահատվում են հրավերով սահմանված կարգով: Բավարար են գնահատվում հրավերով նախատեսված պայմաններին համապատասխանող հայտերը, հակառակ դեպքում հայտերը գնահատվում են անբավարար և մերժվում են:**

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 32-րդ կետի 11-րդ ենթակետի համաձայն՝ էլեկտրոնային եղանակով ծանուցումներն իրականացվում են

տեղեկություններն էլեկտրոնային փոստին ուղարկվելու միջոցով, բացառությամբ պետական գաղտնիք պարունակող գնումների, որի ժամանակ ծանուցումներն իրականացվում են թղթային եղանակով: Հրավերով և հայտով նախատեսվում են պատվիրատուի և մասնակցի էլեկտրոնային փոստի հասցեները: Տեղեկությունների (փաստաթղթերի) էլեկտրոնային եղանակով փոխանակման դեպքում դրանք ուղարկողը տեղեկությունները (փաստաթղթերը) հաստատում է էլեկտրոնային թվային ստորագրությամբ, իսկ հավաստագիրը՝ զետեղված «Նույնականացման քարտերի մասին» Հայաստանի Հանրապետության օրենքով սահմանված կարգով տրամադրված նույնականացման քարտում, կամ տեղեկությունները (փաստաթղթերը) ուղարկում է հաստատված բնօրինակ փաստաթղթից արտատպված (սկանավորված) տարբերակով:

Գնման ընթացակարգն էլեկտրոնային գնումների համակարգի միջոցով կազմակերպված լինելու դեպքում Հայաստանի Հանրապետության ռեզիդենտ հանդիսացող մասնակիցները հայտում ներառվող՝ իրենց կողմից հաստատվող փաստաթղթերը հաստատում են էլեկտրոնային թվային ստորագրությամբ, իսկ Հայաստանի Հանրապետության ռեզիդենտ չհանդիսացող մասնակիցները՝ այդ փաստաթղթերը ներկայացնում են հաստատված բնօրինակ փաստաթղթից արտատպված (սկանավորված) տարբերակով:

Կարգի 40-րդ կետի 4-րդ ենթակետի համաձայն՝ **հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի:** Գնումն էլեկտրոնային համակարգով իրականացվելու դեպքում հիմք է ընդունվում համակարգում կցված՝ մասնակցի կողմից հաստատված գնային առաջարկը:

Ընթացակարգի հրավերի (հետայսու նաև՝ Հրավեր) 1-ին մասի 8-րդ կետի 8.18-րդ ենթակետի համաձայն՝ հանձնաժողովի և (կամ) պատվիրատուի կողմից էլեկտրոնային ծանուցումներն ուղարկվում են համակարգի միջոցով, իսկ մասնակցի կողմից՝ իր հայտում նշված էլեկտրոնային փոստից սույն հրավերում նշված՝ հանձնաժողովի քարտուղարի էլեկտրոնային փոստին ուղարկվելու միջոցով:

Տեղեկությունների (փաստաթղթերի) էլեկտրոնային եղանակով փոխանակման դեպքում մասնակիցը տեղեկությունները (փաստաթղթերը) հաստատում է էլեկտրոնային թվային ստորագրությամբ, որի հավաստագիրը պետք է զետեղված լինի «Նույնականացման

քարտերի մասին» Հայաստանի Հանրապետության օրենքով սահմանված կարգով տրամադրված նույնականացման քարտում, կամ տեղեկությունները (փաստաթղթերը) ուղարկում է հաստատված բնօրինակ փաստաթղթից արտատպված (սկանավորված) տարբերակով:

Հայաստանի Հանրապետության ռեզիդենտ հանդիսացող մասնակիցները հայտում ներառվող՝ իրենց կողմից հաստատվող փաստաթղթերը հաստատում են էլեկտրոնային թվային ստորագրությամբ, իսկ Հայաստանի Հանրապետության ռեզիդենտ չհանդիսացող մասնակիցները՝ այդ փաստաթղթերը ներկայացնում են հաստատված բնօրինակ փաստաթղթից արտատպված (սկանավորված) տարբերակով:

Հայտում ներառվող՝ էլեկտրոնային թվային ստորագրությամբ հաստատվող փաստաթղթերը չեն կնքվում:

Այսպես, Վանաձորի համայնքապետարանի կողմից Վանաձորի աթլետիկայի ՕՀՄՄ ՀՈԱԿ-ի ներքին վազքուղու կառուցման աշխատանքների ձեռքբերման նպատակով հայտարարվել է «ՀՀ ԼՄՎՔ ԳՀԱՇՁԲ-20/92» ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Գրաֆենշին» ՍՊԸ-ն:

ՍՑ-ՆԳ-2020/213 ընթացակարգի քննության ընթացքում Գնումների հետ կապված բողոքներ քննող անձի կողմից պարզվել է, որ Ընկերության կողմից Ընթացակարգին ներկայացված հայտում ներառված Հավելված 2-ը՝ գնային առաջարկը, հաստատված չի էլեկտրոնային թվային ստորագրությամբ, **այսինքն՝ Ընկերության հայտում ներառված Հավելված 2-ը՝ գնային առաջարկը, ներկայացված է Կարգի 32-րդ կետի 11-րդ ենթակետով և Հրավերի 1-ին մասի 8-րդ կետի 8.18-րդ ենթակետով սահմանված պահանջների խախտմամբ:**

Ելնելով վերոգրյալից, գտնում եմ, որ Ընթացակարգի գնահատող հանձնաժողովն ի սկզբանե պետք է մերժեր «Գրաֆենշին» ՍՊԸ-ի կողմից ներկայացված հայտը, հիմք ընդունելով Կարգի 40-րդ կետի 4-րդ ենթակետը, այն է՝ **հանձնաժողովը մերժում է այն հայտերը, որոնցում գնային առաջարկը ներկայացված է հրավերի պահանջներին անհամապատասխան**, սակայն, գնահատող հանձնաժողովը խախտելով Կարգի 40-րդ կետի 4-րդ ենթակետով սահմանված պահանջը, չի մերժել Ընկերության հայտը, փոխարենը Կարգի 41-րդ կետի համաձայն՝ մեկ աշխատանքային օրով կասեցրել է նիստը՝ Ընկերությանը ծանուցելով հայտում արձանագրված անհամապատասխանությունները, այն է՝ հայտում կցված հայտի ապահովումը սխալ է, **թերի է լրացված հավելված 1.1-ը,**

բացակայում է մասնակցի կողմից լրացված և հաստատված ծավալաթերթը, շտկելու վերաբերյալ, որից հետո միայն՝ 24.08.2020թ, նշված անհամապատասխանությունները չշտկելու հիմքով մերժել է Ընկերության հայրը:

Այսպիսով՝ արձանագրում եմ, որ Պատվիրատուի ոչ իրավաչափ գործողությունների արդյունքում խախտվել է Կարգի 40-րդ կետի 4-րդ ենթակետով սահմանված պահանջը, ուստի՝ նման պայմաններում հնարավոր չէ արձանագրել «Գրաֆենշին» ՍՊԸ-ի կողմից Օրենքի 6-րդ հոդվածի 1-ին մասի 6-րդ կետի «ա» ենթակետով նախատեսված պարտավորության խախտման փաստը, հետևաբար գտնում եմ, որ վերջինիս գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն: Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 27.08.2020թ. թիվ 26/26-1/12916-2020 գրությամբ «Գրաֆենշին» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**Գնումների հետ կապված
բողոքներ քննող անձ՝**



ԳՐԻԳՈՐ ՆԵՐՍԻՍՅԱՆ